

Na temelju odredaba članka 8. Zakona o računovodstvu i reviziji Bosne i Hercegovine („Službeni glasnik BiH“, broj 42/04), članka 10. Zakona o računovodstvu i reviziji u Federacije Bosne i Hercegovine („Službene novine Federacije BiH“, broj 32/05), Odluke o nostrifikaciji certifikata i Odluke o prijenosu ovlaštenja („Službeni glasnik BiH“, broj 81/04), te čl. 6. i 27. Statuta Saveza računovođa, revizora i finansijskih djelatnika Federacije Bosne i Hercegovine, Upravni odbor Saveza na sjednici održanoj dana 9. 11. 2006. godine u Sarajevu donio je

## **P R A V I L N I K** **o nostrifikaciji certifikata**

### **Članak 1.**

Ovaj Pravilnik uređuje uvjete i način nostrifikacije certifikata, izdanih izvan BiH, koju vrši Saveza računovođa, revizora i finansijskih djelatnika Federacije BiH (u daljem tekstu: Savez).

### **Članak 2.**

Pod nostrifikacijom se podrazumijeva prihvaćanje ili priznavanje certifikata izdanih od neke druge asocijacije ili drugog ovlaštenog tijela izvan BiH, kao da su izdati od strane ovog Saveza, te izdavanje certifikata Saveza za odgovarajuće zvanje u računovodstvenoj profesiji u skladu s propisima BiH i Federacije BiH.

### **Članak 3.**

Savez će vršiti nostrifikaciju certifikata izdanih izvan BiH na principima uzajamnosti, o čemu će ostvarivati kontakte i sklapati sporazume s profesionalnim asocijacijama, odnosno drugim nadležnim organima i tijelima izvan BiH.

### **Članak 4.**

Kandidati za nostrifikaciju trebaju podnijeti Savezu prijavu za nostrifikaciju, ovjerenu kopiju certifikata izdanog izvan BiH, kao i dokaze o ispunjavanju ostalih uvjeta za certifikaciju koji su utvrđeni ovim Pravilnikom.

Prilikom nostrifikacije certifikata nužno je imati u vidu i Pravilnik o kontinuiranoj profesionalnoj edukaciji osoba iz računovodstvene profesije.

### **Članak 5.**

Certifikat izdat od asocijacije ili drugog ovlaštenog tijela izvan BiH, nostrificira se i zamjenjuje certifikatom Saveza za odgovarajuće zvanje u računovodstvenoj profesiji, pod slijedećim uvjetima:

- a) **Certificirani računovodstveni tehničar:** Kandidat treba imati najmanje četverogodišnju srednju školsku spremu i ispunjavati ostale uvjete sukladno Odluci o uvjetima za stjecanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.
- b) **Certificirani računovođa:** Kandidat treba imati univerzitetsko obrazovanje ili višu školsku spremu i da ispunjava ostale uvjete sukladno Odluci o uvjetima za stjecanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.

- c) **Ovlašteni revizor:** Kandidat treba imati univerzitetsko obrazovanje i da ispunjava ostale uvjete sukladno Odluci o uvjetima za stjecanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.
- d) Kandidat treba biti član Saveza i da je platio članarinu za tekuću godinu.
- e) Kandidat treba podnijeti dokaz o plaćenim troškovima nostrifikacije, koje određuje Upravni odbor Saveza posebnom odlukom, a koji obuhvaćaju troškove polaganje testa i troškove izdavanja novog certifikata.
- f) Kandidat treba prethodno položiti test iz članka 6. ovog Pravilnika.

#### **Članak 6.**

Test za nostrifikaciju certifikata organizira Savez, prema potrebi i u zavisnosti od broja prijavljenih kandidata, a test obuhvaća slijedeće teme:

- a) Legislativa
  - 1) Zakon o gospodarskim društvima
  - 2) zakoni o računovodstvu i reviziji BiH / Federacije BiH
  - 3) Zakon o bankama i drugim finansijskim institucijama
  - 4) zakoni o izravnim i neizravnim porezima
- b) Profesionalna regulativa
  - 1) Kodeks profesionalne etike računovođa i revizora
  - 2) Računovodstvena zvanja i način stjecanja
  - 3) Okvir za sastavljene i prezentaciju finansijskih izvještaja
  - 4) Položaj, uloga, prava i obaveze Saveza
- c) Međunarodni standardi finansijskog izvještavanja (MSFI/MRS)
- d) Međunarodni standardi revizije (MSR)

Kandidati koji su stekli certifikat prema pravilima IFAC-a, odnosno koji su prethodno polagali MSFI/MRS i MSR, o čemu trebaju podnijeti i odgovarajući dokaz, nisu obvezni polagati test iz oblasti pod c) i d), nego samo test iz oblasti pod a) i b) stavka 1. ovog članka.

#### **Članak 7.**

Uz prijavu za nostrifikaciju kandidat dostavlja:

- 1. Ovjerenu presliku diplome o završenoj školskoj spremi;
- 2. Ovjerenu presliku certifikata s programom polaganja za njegovo stjecanje;
- 3. Uvjerenje poslodavaca o iskustvu na računovodstvenim i finansijskim poslovima, odnosno konkretnim radnim mjestima prema zahtjevima Odluke o uvjetima za stjecanje zvanja u računovodstvenoj profesiji, s tim da uvjerenje sadrži i rečenicu: "Pod moralnom, materijalnom i krivičnom odgovornošću tvrdim da su podaci u ovom uvjerenju tačni". Kada je riječ o radnoj karakteristici, istu treba da potpiše i Certificirani računovođa, odnosno Ovlašteni revizor;
- 4. Dokaz o članstvu u Savezu i plaćenju članarini za tekuću godinu;
- 5. Dokaz o plaćenim troškovima nostrifikacije iz članka 4. stavak 1.e) ovog Pravilnika.

Ako je to potrebno, kandidat je uz dokaze iz toč. 1. do 3. dužan dostaviti i prijevod tih dokumenata na jednom od službenih jezika u BiH, od registriranog sudskog tumača.

#### **Članak 8.**

Kandidatima koji ispune sve prethodne uvjete i koji polože test iz članka 6. ovog Pravilnika, Savez vrši nostrifikaciju certifikata i izdaje certifikat Saveza za odgovarajuće zvanje u računovodstvenoj profesiji u skladu s propisima BiH i Federacije BiH i Odlukom o vrstama profesionalnih zvanja u računovodstvenoj profesiji.

#### **Članak 9.**

Nakon izdavanja novog certifikata kandidatu se, na njegov zahtjev i po za to predviđenom postupku, izdaje i licenca za odgovarajuće zvanje, s tim da je za izdavanje licence za Ovlaštenog revizora nadležno Federalno ministarstvo finansija/financija.

#### **Članak 10.**

Ovaj Pravilnik stupaju na snagu i primjenjuje se od dana donošenja.

#### **Članak 11.**

Ovaj Pravilnik će biti objavljen na web stranici Saveza i u stručnim časopisima članica Saveza.

Tumačenje odredaba ovog Pravilnika daje Upravni odbor Saveza, a njegove izmjene i dopune vrše se na način na kako je i donesen.

Broj:PR-1/11-06

Sarajevo, 09. 11. 2006. godine

Predsjednik UO Saveza

Milan Dmitrović